

6-§. Qo'shib olish shaklida qayta tashkil etishni amalga oshirishda moliyaviy hisobot ko'rsatkichlarini shakllantirishning xususiyatlari

35. Qo'shib olinayotgan korxonalar va ular qo'shilayotgan korxona qo'shib olish tartibi va shartlari, shuningdek qo'shib olinayotgan korxonalarning aksiyalari (ulushlari)ni ular qo'shilayotgan korxonaning aksiyalari (ulushlari)ga konvertasiya qilish tartibi belgilanadigan qo'shib olish to'g'risida shartnoma tuzadilar. Har bir korxona qo'shib olish shaklida qayta tashkil etish, qo'shib olish to'g'risidagi shartnoma va topshirish dalolatnomasini tasdiqlash to'g'risidagi masalalarni qo'shib olishda ishtirok etuvchi korxona ta'sischilari (aksiyadorlari) umumiy yig'ilishining muhokamasiga kiritadi.

36. Qo'shib olish shaklida qayta tashkil etishda yakuniy moliyaviy hisobot faqat qo'shib olinayotgan korxona tomonidan uning faoliyati to'xtatilgani haqidagi yozuv Reyestrda kiritilishidan oldingi kungacha bo'lgan holatga ko'ra tuziladi. Bunda yakuniy moliyaviy hisobot tuzilgunga qadar daromadlar va xarajatlar hisobini yuritish schyotini yopish va qo'shib olinayotgan korxonaning sof foydasi summasini ta'sischilarning qo'shib olish shaklida qayta tashkil etish to'g'risidagi qarori (shartnomasi)da belgilangan maqsadlarga yo'naltirish (taqsimlash) amalga oshiriladi.

37. Boshqa korxona (korxonalar)ni unga qo'shish jarayonida ta'sischilarning qaroriga asosan faqat aktivlar va majburiyatlar hajmi o'zgargan va joriy hisobot yili uzilib qolmagan korxonada daromadlar va xarajatlar

hisobini yuritish schyoti yopilmaydi va qo'shib olinayotgan korxona faoliyatini to'xtatish davlat ro'yxatidan o'tkazilgan sanaga bo'lgan holatga ko'ra yakuniy moliyaviy hisobot tuzilmaydi.

38. Qo'shib olish shaklida qayta tashkil etishda qayta tashkil etilayotgan korxonaning joriy faoliyati bilan bog'liq barcha operatsiyalar, shuningdek topshirish dalolatnomasi tasdiqlangan sanadan boshlab o'tgan davrda amalga oshirilgan qayta tashkil etish bilan bog'liq xarajatlar qo'shib olinayotgan korxona faoliyatining to'xtatilishi haqidagi yozuvni Reyestrda kiritish sanasiga qadar o'z faoliyatini to'xtatayotgan korxonaning buxgalteriya hisobida va yakuniy moliyaviy hisobotida aks ettiriladi.

39. Qo'shib olish shaklida qayta tashkil etishda qo'shib olingan oxirgi korxonaning faoliyatini to'xtatish haqidagi yozuv Reyestrda kiritilgan sanaga bo'lgan holatga ko'ra huquqiy vorisning moliyaviy hisoboti topshirish dalolatnomasi ma'lumotlari hamda qo'shib olinayotgan korxonaning buxgalteriya hisobida aks ettirilgan, ushbu BHMSning [38-bandida](#) sanab o'tilgan operatsiyalarni hisobga olgan holda tuzilgan yakuniy moliyaviy hisobot miqdoriy ko'rsatkichlarini va huquqiy vorisning qo'shib olinayotgan korxona faoliyati to'xtatilganini davlat ro'yxatidan o'tkazish sanasiga bo'lgan holatga ko'ra tuzilgan moliyaviy hisoboti miqdoriy ko'rsatkichlarini (mazkur BHMSning [26-bandida](#) keltirilgan va o'zaro hisob-kitoblarni aks ettiruvchi miqdoriy ko'rsatkichlarni istisno qilganda) satrma-satr birlashtirish (qo'shish yoki, o'tgan yillarning qoplanmagan zararlari bo'lgan taqdirda, ayirish) asosida,

shuningdek mazkur BHMSning [41](#) va [42-bandalarida](#) nazarda tutilgan holatlardan kelib chiqib tuziladi.

Bunda huquqiy voris va qo'shib olinayotgan korxonaning qo'shib olinayotgan korxona faoliyati to'xtatilganini davlat ro'yxatidan o'tkazish sanasiga qadar bo'lgan hisobot davrlaridagi moliyaviy natijalar to'g'risidagi hisobotlar (2-son shakl) miqdoriy ko'rsatkichlarini qo'shish amalga oshirilmaydi.

Qo'shib olish shaklida qayta tashkil etishda huquqiy vorisning qo'shib olinayotgan korxona faoliyati to'xtatilganini davlat ro'yxatidan o'tkazish sanasidan keyingi davrdagi moliyaviy natijalari to'g'risidagi hisoboti (2-son shakl)ning miqdoriy ko'rsatkichlari qo'shib olish shaklida qayta tashkil etilgan korxonaning daromadlari va xarajatlarini aks ettiradi.

40. Huquqiy voris qo'shib olingan oxirgi korxona faoliyati to'xtatilgani haqidagi yozuv Reyestrda kiritilgan sanaga bo'lgan holatga ko'ra moliyaviy hisobotni tuzishda qayta tashkil etish jarayonida olingan aktivlar, majburiyatlar va boshqa miqdoriy ko'rsatkichlar haqidagi ma'lumotlarni ular topshirish dalolatnomasida aks ettiriluvchi baholashda, qo'shib olish shaklida qayta tashkil etilayotgan korxonaning qo'shib olinayotgan korxona tomonidan tuzilgan yakuniy moliyaviy hisobotidagi miqdoriy ko'rsatkichlardan kelib chiqib to'ldiradi.

41. Qo'shib olish to'g'risidagi shartnomaga va unda nazarda tutilgan ta'sischi larning qo'shib olish shaklida qayta tashkil etilayotgan korxonalarning aksiyalari (ulushlari, paylari)ni huquqiy vorisning aksiyalari

(ulushlari, paylari)ga konvertasiya qilish (ayirboshlash) tartibi to'g'risidagi qaroriga muvofiq, huquqiy vorisning qo'shib olingan oxirgi korxonaning faoliyati to'xtatilgani haqidagi yozuv Reyestrda kiritilgan sanaga bo'lgan holatga ko'ra moliyaviy hisobotida tarkib toptirilgan ustav kapitali aks ettiriladi.

Agar qo'shib olish to'g'risidagi shartnomada huquqiy vorisning ustav kapitali miqdorini qayta tashkil etilayotgan korxonalarning ustav kapitallari umumiy summasidan, shu jumladan qo'shib olish shaklida qayta tashkil etishda qatnashayotgan korxonalarning o'z manbalari (qo'shilgan va zaxira kapitali, taqsimlanmagan foydasi va h.k.) hisobiga ko'paytirish nazarda tutilgan bo'lsa, huquqiy vorisning qo'shib olingan oxirgi korxonaning faoliyati to'xtatilgani haqidagi yozuv Reyestrda kiritilgan sanaga bo'lgan holatga ko'ra moliyaviy hisobotida qo'shib olish to'g'risidagi shartnomada qayd etilgan ustav kapitali miqdori aks ettiriladi.

Agar qo'shib olish to'g'risidagi shartnomada huquqiy vorisning ustav kapitali miqdorini qayta tashkil etilayotgan korxonalarning ustav kapitallari umumiy summasidan kamaytirish nazarda tutilgan bo'lsa, huquqiy vorisning qo'shib olingan oxirgi korxonaning faoliyati to'xtatilgani haqidagi yozuv Reyestrda kiritilgan sanaga bo'lgan holatga ko'ra moliyaviy hisobotida qo'shib olish to'g'risidagi shartnomada qayd etilgan ustav kapitali miqdori aks ettiriladi, o'rtadagi farq esa huquqiy vorisning buxgalteriya balansi «Xususiy mablag'larning manbalari» bo'limida «Qo'shilgan kapital» miqdoriy ko'rsatkichi bilan tartibga solinishi lozim.

42. Agar qo'shib olish to'g'risidagi shartnomada nazarda tutilgan ustav kapitalining miqdori huquqiy vorisning sof aktivlari qiymatiga mos kelgan bo'lmasa, huquqiy vorisning qo'shib olingan oxirgi korxonaning faoliyati to'xtatilgani haqidagi yozuv Reyestrda kiritilgan sanaga bo'lgan holatga ko'ra buxgalteriya balansi «Xususiy mablag'larning manbalari» bo'limining miqdoriy ko'rsatkichlari quyidagi tartibda shakllantiriladi.

Aksiyalarni konvertasiya qilish vaqtida huquqiy vorisning sof aktivlari qiymati ustav kapitali miqdoridan ko'p bo'lib qolsa, huquqiy vorisning qo'shib olingan oxirgi korxonaning faoliyati to'xtatilgani haqidagi yozuv Reyestrda kiritilgan sanadagi holatga ko'ra buxgalteriya balansi «Xususiy mablag'larning manbalari» bo'limining miqdoriy ko'rsatkichlari sof aktivlar qiymati miqdorida, ustav kapitaliga va qo'shilgan kapitalga ajratgan holda shakllantiriladi (sof aktivlar qiymatining aksiyalarning jami nominal qiymatidan oshishi).

Qolgan hollarda, agar huquqiy vorisning sof aktivlari qiymati ustav kapitali miqdoridan ko'p bo'lib qolsa, o'rtadagi farq huquqiy vorisning qo'shib olingan oxirgi korxonaning faoliyati to'xtatilgan sanadagi holatga ko'ra buxgalteriya balansi «Majburiyatlar» bo'limida «Uzoq muddatga uzaytirilgan daromadlar» va «Muddati uzaytirilgan daromadlar» miqdoriy ko'rsatkichlari bilan manfiy gudvill tarzida tartibga solinishi lozim.

Agar huquqiy vorisning sof aktivlari qiymati ustav kapitali miqdoridan kam bo'lib qolsa, o'rtadagi farq huquqiy vorisning qo'shib olingan oxirgi korxonaning faoliyati to'xtatilgani haqidagi yozuv Reyestrda kiritilgan sanadagi holatga ko'ra buxgalteriya balansi «Uzoq

muddatli aktivlar» bo'limida «Nomoddiy aktivlar» miqdoriy ko'rsatkichi bilan gudvill tarzida tartibga solinishi lozim.